



殷太師忠烈錄卷五

華亭曹安以寧編集

上黨暴孟奇純甫重編

廣陵李應陽稚玄校訂

本事

祭文碑

宣弘文館薛純陀

維大唐貞觀十九年歲次乙巳二月己亥朔廿日戊
午皇帝敬遣太府卿蕭欽宗正少卿附馬都尉長孫
冲等持節以少牢之奠祭殷故少師比干之靈朕聞
龍躍鳳翔必資鱗羽人君御下必藉忠良元首股肱

其道尚矣惟公誕靈山嶽降德星辰苞金石以爲心
蘊松桂而爲質不以夷險易操不以利害變節孟津
之師挹高風而莫進朝歌之滅資至德而延期且道
喪時昏郟邪並用暴公虛主正直難居是以江漢神
龜殘形由于蘊哲荆山和璞碎質以其懷珍丹耀彩
而磨肌翠含色而解羽驚風拂野迥樹先彫零雨被
枝高花早墜良由佩奇銜美獨秀孤貞雖明灼存亡
詎能遣凶殘之累知周萬物不能離顛沛之艱然則
大厦將崩非一本之能止天道去矣豈一賢之可全
且夫舉過顯仁揚善隱惡忠臣之義也三諫不入奉

身而退聖人之道也何必殉形於國以速殷商之亡
剖心於朝以深獨夫之罪每懷及此不勝憤惋忠者
覩朕斯言以爲飾非拒諫智者明于此意當知惜善
愛仁嘆往哲之不追嗟後賢之未及然則犯顏色逆
龍鱗奮不辰丁修身不貳蹈斯節者罕有其人非知
之難行之不易所以永懷千古駐駕九原悽愴風煙
靡尋餘跡荒涼丘隴空有其名昔周武封墓仲尼表
德姬文葬骨異世同臣雖今古殊途年代冥漠式遵
故實爰贈太師清酌少牢以陳薄禮遊魂尚其有知
嘉典永承無斃

元魏孝文帝弔殷比干文

維皇構遷中之元載歲御次乎闕茂望舒會於星紀
十有四日維甲申予揚和淇右蹠駟鄘西指崧原而
搖步順京途以啓征路歷商區轄留衛壤泛目睇川
縱覽觀陸遂傍睨古跡游瞰曩風覩殷比干之墓悵
然悼懷焉乃命馭駐輪筴驥躬矚荆棘荒朽工爲綿
蕞而遺猷明密事若對德慨狂后之猖穢傷貞臣之
婞節聊興其韻貽弔云爾曰

三才之肇元兮敷五靈以扶德含剛柔于金木兮資
明暗于南北重離耀其炎暉兮曾坎思玄以乘照伊

稟常之懷生兮以睿遞其啓則晝皎皎

也

其何朗

兮夜幽幽而致蔽哲人昭昭而澄光兮狂夫黜黜其

若翳咨堯舜之耿介兮何桀紂之猖敗沉湎而不知

甲兮終或已已貽戾蹇蹇兮比干藉冑兮殷宗含精

兮誕粹冥樹兮英風凜蘭露以滌神餐蓀英而儼容

茹薜荔以蕩識佩江籬而灑躬履霜而結冰兮卒窘

忠而彌濃千金豈其吾珍兮皇舉寔余所鍾奮誠諫

而燼軀兮導危言以釁鋒嗚呼哀哉惟子在殷實爲

梁棟外贊元功內徽辰共匡率袞職德音遐洞周師

還旆非子誰貢否哉悖運邁此不辰三綱道沒七耀

暉泯負乘竊器怠棄天倫懷誠齎怒讜言焉陳昆侯
已醢子不見歟邢侯已晡子不聞歟微子去矣子不
知歟箕子奴矣子不覺歟何其輕生一至斯歟何其
愛義勇若歸歟遺體既灰不其惜歟永矣無返不其
痛歟嗚呼哀哉嗚呼哀哉夫天地之長遠兮嗟人生
短或作稔多殃往者子弗及兮來者子不厭當胡契闕
之屯亶兮值昏化而永良曷不相時以卷舒兮徒委
質而顛亡雖虛名空傳于千載詎何勲之可揚奚若
騰魂以遠逝疾飛足而歸昌得此肩于尚父卒同協
于周王建鴻績于盛辰啓肯古音宇于齊方闡穆音

于萬祀傳寃業以修長而乃自受茲斃視竅殷辛剖
心無補迷機喪身脫非武發封墓誰因嗚呼介士胡
不我臣重曰世昏昏而溷濁兮自藹藹其無光時坎
廩而險隘兮氣僚廳以飛霜子奚其不遠逝兮乃侘
傺而耻故鄉可乘桴以浮滄兮求蓬萊而爲糗御芝
條以昇虛兮與赤松而翱翔被芟荷之輕衣兮曳芙
蓉之縗裳循海波而瀏颺兮望會稽以歸禹紉蕙芷
以爲紳兮扈荃佩而容與寫鬱結于聖人兮暢中心
之稔語執垂益而談卡音弄兮交良朋而憶苦言既盡
而東騰兮吸朝露而長舉登岵巘而悵望兮眺扶桑

以停佇謁靈威以問路兮乘谷風而拔宇遂假載于
羲和兮憑六螭以南處翥衡嶽而顧步兮濯沅湘以
自潔爵炎州之八桂兮踐九疑而遙稟即蒼梧而宗
舜兮拂埃霧以就列採輕越而肅帶兮切寶犀以貫
介訢淳風之淪覆兮語簫韶之湮滅召熊羆而敘釋
兮問重華之風桀爾乃飲正陽之精氣兮遊丹丘而
明視捐祝融以求烏兮銜朱鸞以修指因景風而凌
天兮迴靈鵬以西履降黃渚而造稷兮慰稼穡之艱
難訪有郢之詵詵兮遇何主而獲安然後陟崑崙之
翠嶺兮擊瓊枝而盤桓步懸圃以溜澆兮咀玉英而

扞蘭歷崦嵫而一顧兮俯沐髮于涓盤仰徙倚于閭
闔兮請帝闈而啓關天沉廖而廓落兮地寂寥而遼
闊食淪陰以裨氣兮佩瑤玕而鳴鏘拜招搖而修節
兮少躊躇以相羊祈馭驢而總轡兮隨泰風以飄揚
瞰不周而左旋兮縱神駟以北望尋流沙而騁轡兮
暨陽周以縹駕靡芸芳以馥體兮索夷杜而祗衙奉
軒轅而陳辭兮申時俗之不暇適岐伯而修命兮展
力牧以問霸歛沆瀣之純粹兮闕寒門之層冰聆廣
莫之颺瑟兮覲黔羸而迴凝擁玄武以涉虛兮亢神
冥而威陵象駿隲而晻鬱兮途曼曼其難勝笑飛廉

而前驅兮使燭龍以輝澄歸中樞而睇睨兮相玄莫
之已周慨飛魂之無寄兮颯翾袂而上浮引雄虹而
登峻兮揚雲旗以軒遊躍八龍之蛇蛻兮振玉鸞之
啾啾攀彗星以朗導兮委升朝乎大儀教重陽之帝
宮兮凝精魄於旋曦扈湯曜而靈修兮豈傳說之足
竒但至槩之不悛兮寧溘死而不移

使持節驃騎大將軍都會司豫荆郢洛東荆六州

諸軍士開府州牧咸陽王元禧 侍中司徒公都

督中外諸軍士太子太師駙馬長樂郡開國公馮

誕 使持節司空公太子太傅長樂公丘目陵亮

特進太子太保廣陵王元羽 侍中姬平王元綱

兼尚書右僕射吏部尚書任城王元澄 散騎

常侍祭酒光祿勳卿高陽伯元儼 太子右詹事

姑臧伯李韶 散騎常侍領司祭中大夫元景光

祿大夫錄太僕少卿李堅 中常侍中尹高都子

秦松騎驥將軍大野慤 司衛監元翊萬臣于勁

員外散騎常侍光祿勳少卿富平子丘目陵純

給事黃門侍郎郭祚兼司衛兼少府少卿漆雅

給事黃門侍郎領著作卿崔光 典命中大夫太

子中庶子游肇 太子立更令襄陽伯元尉 給

唐九代忠烈錄 卷五 六
事中乙旃恬 中給事錄大官令白勣 兼給事
黃門侍郎員外散騎侍郎守屬國下大夫王翔
散騎侍郎東郡公陸昕 白衣守尚書左丞公孫
良 中壘將軍帶登聞令游綬 大官令鉅鏗伯
魏佑 通直散騎侍郎邢鸞韋纘 武騎侍郎獨
孤遙張單李華 員外散騎侍郎崔逸崔廣陸布
道 尚書侍郎崔哲張映高觀李引司馬定朱孟
孫李良軌同至

元勅修墓祭

仁宗延祐三年夏四月勅衛輝昌平守臣修殷比干

墓唐狄仁傑祠歲時祭祀

祭文

惟神生殷之季王室至親從容就義遂隕厥身雖罹
凶暴萬代稱仁我朝啓運崇異忠純神之廟食歲致
嚴禋茲以牲帛醴齊用申常祭

大明祭典

禮部勘合內一件建言民情等事該衛輝府汲縣知
縣盧信奏稱比干以死勤事歷代褒封祭祀不一要
將墓前地畝子粒鼎新廟貌乃撰祭文遣本府知府
等官春秋祭祀以勵風化等因本部看得比干係商

臣死于忠諫孔子許其仁孟子稱爲賢得祭法以死
勤事之義祭之誠足以勵風化故自魏唐以來歷代
列于祀典且置廟田以供祀事至今猶存今河南司
府縣官民旣合詞欲興廟祀奏請祭文合無俯順輿
情准其所奏行移翰林院撰祭文遣本府知府等官
春秋致祭行令所在官司將墓前原有地畝子粒除
依例置辦祭品供祀外其餘剩子粒着令廟戶張琬
等五家倩工辦料修葺廟宇務要完潔以奠神位不
許假公營私侵剋入已仍令有司時加提督毋得干
擾于民

欽降春秋祭文

維年月日衛輝府某官等敢昭告于

殷太師忠烈公比干之神曰惟神憂國愛君志誠惻
怛直言諫紂以盡臣節殺身成仁於心乃安孤忠大
義名教攸崇爰命有司祇修常祀英靈如在尚其昭
格尚饗

祭文

行人張應福

嗚呼維公忠蓋之誠對越天地剛烈之氣貫徹古今
重社稷如丘山輕一身若翎羽愛君父如腹心棄一
心若土芥吁嗟乎比公血心雖舍赤心猶生赫赫日

月之光不足以照臨乎此心焯焯雲漢之章不足以
煥發乎此心巍巍嵩嶽之高不足以掀揭乎此心浩
浩大河之長不足以洗滌乎此心萬古長恨百代詒
嗔一言傾國七竅碎身言之惻然寧免酸痛乎予心
聊陳品奠冀以慰恪乎爾心伏惟尚饗

地畝祭物志

比干墓東南地七頃五十畝係前代相傳供祭令汲
縣民張綱張琬李讓李綱崔昇五戶各佃種一頃五
十畝納租辦祭恐後民沒先任知府張亨勒石志之
今知府暴 覆查前地七頃五十七畝八分佃戶

張綱等年久莫稽另召臨祠居民王曰都王三錫曹
政崔坤劉槃楊時新張一清陳榮李時新李朝祿李
登陳見殷璉張光祚虞禮張璉等十六戶佃種每年
共納租錢一十九千一百五十一文汲縣收貯以供
春秋二祭及上司謁祭外餘剩者解府庫候補廟垣
用

舊每歲四月初四日致祭今改春秋丁後巳日致祭
羊一 豕一 帛一 果酒香燭等物

題名

嘉祐七年十月十二日建州管内觀察使知軍州事

李瑋恭謁殷少師之祠時庫部員外郎新知慶成軍
王嘉錫屯田員外郎通判蘇衮太常博士孫奇太子
中書監倉陳安世軍士判官趙蘊軍士推官王頌司
法參軍王汝弼前定襄令張公庠汲令王臣主簿劉
洗孫同至

嘉祐八年十月乙酉尚書屯田員外郎通判衛州權
發遣軍州事蘇衮恭謁商少師忠烈祠西京左藏庫
副使權大名府路兵馬都監侍其渙西頭供奉宮句
當淇水監郭寅秘書省著作佐郎路授光祿寺丞段
繹汲縣主簿邵僧綽同謁

貞觀十九年二月二十日司徒太子太師趙國公無
忌開府儀同三司申國公士廉光祿大夫民部尚書
莒國公唐儉 吏部尚書駙馬都尉柱國安德郡開
國公楊師道 中書令江陵縣開國子岑文本 正
議大夫守中書令兼太子左庶子馬周 中大夫守
黃門侍郎褚遂良等奏請以贈比干詔并祭文刻石
樹碑

治平元年春三月甲子平山王瑜太原溫致伏謁太
師之祠超想風烈感嘆久之

熙寧八年乙卯歲四月四日尚書虞部郎中知軍州

事傳亶子諒尚書屯田郎中通判軍州事石溫之懿
老禱雨太師祠下

熙寧丁巳六月五日仲謨忠甫邦直至

元符二年九月十日前汲令大名石采汲令博關朱
子才前共城簿諸任楊濩汲縣簿原武張淇同謁

東光張邦光同邦榮邦昌欵謁商少師祠大觀二年
九月二十五日題

永安韓漢老元城趙庭烈共城孔濟川房山孫彥祥
樂郊張魏卿繁陽殷商甫敬謁太師祠下抵莫方歸
大定癸未中秋晦日高平李致美題

衛州教授范構鄉貢進士高夢得同敬謁泰和甲子
歲清明日

延祐丁巳仲冬朔衛輝路總管府達魯花赤孛蘭奚
副達魯花赤脫因經歷甯鼎提控案牘兼照磨承發
架閣蔡裔同拜太師廟墓

天曆二年三月十四日陝西諸道行御史大夫阿里
海涯以平章政事赴召中書省翰林學士知制誥同
修國史張養浩以御史中丞行臺陝西解后於汲縣
驛中越二日癸酉謹齊心同拜謁太師廟墓惕然寅
畏迄於禮成於戲以仁得名非太師之心也而吾夫

子稱之者蓋感其至公血誠爲天下後世立教耳於
是聞者咸爲愕然因并志之同來者直省舍人元公
河南行省都事李德元監郡帖木兒總管王昱副漕
運李克讓府判李世榮府幕屬王居敬霍仲明宋元
記之者陝西諸道行御史臺御史中丞濟南張養浩
凡十一人書之者浚儀吳炳也

幡竿石刻皇祐壬辰四月立此幡竿於太師殿前

五卷終

殷太師忠烈錄卷六

華亭曹安以寧編集

上黨暴孟竒純甫重編

廣陵李應陽稚玄校訂

贊

比干贊

空同李夢陽

箕啓存祀干以殺身殷稱七竅孔贊三仁烈烈太師
實爲國禎人之云亡邦是用傾鹿臺玉焚麥秀吞聲

辭

弔辭

前人

原大國忠烈金 卷六
至大三年二月癸丑朔越四日丙辰資善大夫衛輝
路總管府達魯花赤兼本路李蘭奚欽奉上命肅謁
忠烈景仰曷既廼命馬處禮作文以弔之曰

太師之忠烈兮今古罕比越歷殷周漢唐宋之世兮
芳名累累景忠烈而致弔兮悠悠遐思昔公當殷之
末世兮時否而蹴日罹親則叔父兮位則少師顧宗
國之將覆兮忍無言而素尸奮剛節而直前兮嬰驪
龍而不移視一身如鴻毛兮惟祀絕之爲泐死得其
死兮復有奚疑苟偷生於朝夕兮顏其忸怩時公之
存兮寢孟津之虎貔待公之沒兮致牧野之熊羆存

亡止於一身兮乃繫殷社稷之盛衰彼箕子佯狂而
微子去兮蓋達節以守宜成愛君之仁於一律兮亦
各擇其重者而爲之身雖亡而德不亡兮猶衛水之
流伊一抔之土高並西山兮爲萬世臣子之刑儀增
封加太師忠烈兮亦以賁志長往之可悲風聞異載
兮不以世故變遷而固知奚等叨管茲土兮敬陳俎
殽而酌彘卮庶馨香格於淵泉兮陟降左右而匪遺

弔辭

莆田周進隆

監察御史

紂王不德兮穢跡滋彰克虛大肆兮殃及四方少師
慨與國兮義均存亡乃蹇蹇而力諍兮冀振頹綱何

獨夫猶不悟兮遭剖心之慘傷歛英雄于地下兮與
龍逢而徜徉朝歌之上兮鄘城之旁封丘數尺兮玉
瘞珠藏拱太行之巍巍兮烟樹蒼環淇水之悠悠兮
泉流長繫忠節之烈烈兮萬古名香

賦

弔賦

長垣王璽進士

方天下未附於周而帝命猶監於殷去武丁之未遠
幸湯典之猶存外四海以爲疆囿率土而作民當是
時也苟有中智之主則文武乃其外翰而望旦皆其
陪臣後世將不知有周而商道抑誰與胥淪而何適

受終曠且昏唯恃狂智日肆驕淫姻瑣登躋踈遠至
仁女戎煽處剪伐周親微子去之以永祀箕子佯狂
而爲奴唯夫子介乎二者之間而不知其何所趨旣
不狂而不去將是持而是扶懼天鑒之永遏吐壽國
之良圖蓋中膏盲之藥石而乃毒溪魚之竦茶將謂
回天以揭日而終剖心以剥膚吁嗟乎已矣哉意彼
殷士之麗億而於一夫子之莫贖豈天命之奪殷抑
殷適之自忽人心因之以去國命隨之而卒鼎不知
沒於誰之手而烏不知止於誰之屋茲蓋殷適之自
壞而豈夫子之不淑吁嗟乎已矣哉夫子之軀雖蹈

白刃以捐亡而夫子之名乃歷萬世而有光雨晦濛
而不濕雲渺溟其何傷水泱泱而不涸山蒼蒼以無
疆夫子之風如此蓋自有以動乎後之人或引裾以
竟辭或面折而拂君或正名分而却嬖幸之座或爲
社稷以叩從危之輪意者皆慕夫子之風而然而於
一死亦烏足論嗚呼夫子雖死猶不死也清冽之風
夫子之魂衛源之上夫子之墳前通直道後抱孤村
林巒在陽泉源在陰迷朝歌之宿霧掩太行之孤雲
黍離離以自實草蒙蒙而自芬驅牛羊而上下偕樵
牧以登臨文破裂而失畫碑顛仆以蒙塵知者過于

其側輒歔歔而沾巾或酹以清醑或薦以青蘋將陳
辭以跽問抑不知夫子聞乎不聞

詩

四言古體

和順王雲鳳 右僉都御史

殷衰周熾微去箕奴獨夫罔聞酣淫以娛天命有赫
西土之孤死諍臣職不暇殫鉄庶幾惻我君王改途
求仁得仁何怨心剗宛彼崇丘暮雨春蕪有客南來
載瞻載趨摩挲古刻立馬斯須淒淒野風鼓樹以呼
悵望朝歌予懷鬱紆

五言古體

邵雍

宋人字堯夫學者稱康節先生

精誠皦於日發出為忠辭方寸已盡破獨夫猶不知
高墳臨大道老木無柔枝千古存遺像翻為諂子嗤

黃巖謝昭

翰林侍書

商業寢衰薄大寶傳昏庸炮烙恣殘忍沉湎成盲聾
王綱慢不振祀典茫弗崇况彼姬姓臣日興西土功
元兄惜顛濟問策言盡忠故為存祀計去國心忡忡
父師出誓語臣僕寧苟從狂發心不移甘在囚困中
擎天豈無力跬步不可通回首中外人草竊如蟻蜂

少師積憂份犯諫逆帝聰輕身眇一粟沉魄何匆匆
忠魂蕩今古冤血腥奸雄高墳逼官道穹碣盤蛟龍
灑水寫哀響太行凝愁容於乎日月有薄蝕得輝恒
昭融乾坤有終始令名垂不窮寥寥三千載披簡如
昨逢

南陽李賢

吏部尚書兼翰林學士

吾觀商賢臣比干忠最切痛念社稷傾辛惡浮夏桀
况為諸父親忍覩宗國滅苦諫進直言惓惓冀改轍
有君不有身無復論明哲志在回君心一誠不暫輟
顧惟惻怛情深憂天命絕休戚義所同捐生未為拙

所貴在成仁殺身豈願悅但求此心安肯教天理缺
無為亦無私于焉昭大節微子去不留宗祀庶無竭
箕子既為奴伴狂恥自雪哀哉少師忠剖心心尚愜
所行雖不同易地則無別自靖獻先王曾不見優劣
孔子稱三仁後世復何說第于死者悲潛然出淚血

天台徐孚

憶昔商季世祖烈日泪陳夫子實貴戚位在師保臣
忠誠乃奮發苦口批逆鱗君心日以蠱不復念懿親
一朝心見剖周師踰孟津身存國與存身亡國沉淪
乃知賢用舍端是興亡因商辛逝已久至今惡如新

夫子墳數尺嵩華爭嶙峋嗚呼身可殺芳名惡可湮
景仰千載上龍逢真比鄰敢告後來者仁賢國之珍

吉水陳旭
汲岸訓導

商業日淪喪微箕甘去辱公時進直言期君保宗國
竟剖賢人心百身胡可贖廟墓垂千秋悲風號古木
我來酌清醕可為一痛哭

嘉禾金景輝
藩司照磨

四序易代謝萬物有盛衰惟茲忠義氣千古無窮期
慨彼有殷季王綱日陵夷獨夫肆荒淫百姓困瘡痍
微遜箕已囚臣僕皆詭隨惟公位少師宗社係安危

直諫遭剖心九鼎倏已移
竭來三千年高名耿不虧
悠悠淇水上佳城樹穹碑
累朝崇祀典激節勵素尸
薄夫過其墟寧不有所思

無錫劉弘 長垣尹

傷哉商道衰牝鷄忽為孽
銅柱焚炙炎鹿臺陳腐結
德政棄不修草野從攘竊
公言藥石攻匪為掉長舌
冥然竟弗省酷虐生枝節
剖心視七竅心剖國隨滅
故官禾黍秋骨冷心猶熱
借問是何心忠愛與剛烈
此心天地同萬古難磨折
道旁兀高墳清泉抱林樾
穹碑日摩挲餘光益昭晰
尼父評三仁自靖無遺缺

我謂三仁難惟公更奇
傑翹首汲山岡弔罷情猶切

吳門史昱 汲庠訓導

晨遊向城北感此忠臣祠
直言為邦國剖死真堪悲
遙山拱高塚細蘚粘殘碑
天長與地久名節安可虧

會稽章忱

嗣服貴有德俊命亦靡常
云何紂天子淫泆亂舊章
比干匪無謂定非識所將
剖心豈不慘靖獻于先王
一身甫隨化九鼎已非商
昔為文物都今為禾黍場
巋然一坏土萬古摩青蒼
我行朝歌野望望憎慨慷
君以人事天胡為絕忠良

獨夫拒忠諫元老甘剖心竅隨白刃見赤色凝堅金
入火不受焦入水不伏沉九泉埋不得化作丹鳳吟
夜宿湯陵樹朝鳴扶桑林

李元 監察御史

建業胡汝嘉

河南參議前翰林院編修

層雲凝崇岡盤迴淇衛道聞是殷少師古墳縈烟草
憶昔殷德衰狡童恣顛倒牝辰盪昏風爛熳不可掃
嗟彼明哲士所見豈不早顧此恢恢懷未忍忘未造
君心萬一悟或可緩天討事去身與俱無愧彼蒼昊
不見朝周人抱器驅繁縞深衷自有託誰當分白皂

至哉宣父言此理宜深考

崑山張謙 脩武尹

獨夫恣克殘赤子失懷抱少師進直言剝心痛甘受
宗國成故墟高墳屹當道銅盤鑄銘文萬古那能朽
東吳潘誠

殷鼎未缺壞賢人胡弗容末葉穢德彰獨夫固當雄
少師扶諫轂弼亮慚苟從雖然遇剝剔天地知厥衷
高墳自姬周我我鬱其封至今千載下聲教多遺風

郡人張衍慶

翰林院修撰

鷓鴣聲殷室湯王正域期元勳時佐命一德咸師資

堯舜日都俞禹益恒孜孜由來求世德帝業厚無涯
傷哉運中衰受辛惡已瀕餘非叢衆誓忠言盡自蚩
仁賢空翊亮宗社已瀕危微箕各有得公死甘如飴
古今死誰無公死堪涕洟剖心豈識聖殉國心可知
嗟彼狂惑徒殘虐翻滋疑至哉尼父言三仁揭民彛
自今閱世代褒封竟一詞青青江草春燁燁園葵蕤
遲暮委泥沙良無堅貞姿用媿奸諛心大書少師碑
周人曰昌大殷鼎垂一絲二子甘污辱太師安所之
歸然一諫死自請良乃是千古存君臣傷哉衛之水

寧晉蔡駿

巡按河南監察御史

獲嘉曹祥

按察副使

嗟嗟殷少師志氣何激昂直言諫人主遽乃罹剝傷
千年享明祀古墓依高岡寄與容悅臣能無愧中腸

廣陵李應陽

懷慶府學教授

蠹蠹道傍墓翼翼墓前祠赫赫周武封煌煌殷少師
昔殷祚將燼獨夫惡逾滋奢淫殫瓊瑤酷虐恣刑施
疏戚諫輔盡中外草竊危微遜箕囚奴國勢疇與持
少師况諸父懼切宗社移自靖獻先王矢獨顛隳維
極諍期悟悛違恤剝剖罹保身非不諳拒諫非不知
臣躬既誓委臣心終不移寸丹羽七竅但願君王知

皇曹奈難格淵衷良曷虧宣聖稱三仁仁顯諒尤奇
顧茲身後名原茂生前期絕鶴垂史策輝耀賁廊淇
過者爲停嗟聞者爲酸悲誰能世長碧埒寧祇逢丘夷
至今忠烈氣流貫穹壤彌

青陽寧璉 汲縣尹

王子貴戚家生也當末造蒙難雍帝系剖心明臣道
太行迥高遠衛水流渤澳武王封峻崇孔子書剝落
偉哉古人心後先同歸著我見獨躊躕拜築墓前石

七言古體

陵川郝經 元翰林學士

斫脛河南比干墓崔嵬尚是武王土一丘直欲壓太
行一死能令重千古國亡突兀見真純龍逢與君冠
夏殷無人語與魏鄭公良臣不幸爲忠臣已醢九侯
紂猶忍箕子佯狂微子去三仁一仁獨殺身剖心庶
使王心悟王終不悟國遂亡朝歌無人至今荒行人
只拜比干墓有殷忠臣獨不忘

前人

壯哉此城冠河山老玉回報青孱顏建邦立極古有
制何乃獨在河朔間獨夫智力制天下瞰視中原疆
五霸誰知天與六州王八百諸侯已從化摘星樓頭

醉未醒酒池一夜蜚血驚成湯高宗遂不祀珠宮瑤
臺爲土平我來嘆感重延佇驅車不入朝歌路陰風
莽蒼吹短衣落日投文比干墓

五言律

臨海侯臣

河南布政

直諫名猶在剖心事可傷累朝崇贈謚千古播芬芳
浩氣乾坤塞孤忠日月光淒涼荒塚外烟樹晚蒼蒼

盧龍王佐

進士

少師忠諫死千載氣如生賈禍非爲佞稱仁豈是名
荒岡凝古色老樹作秋聲使有姦雄過能無悚愧情

蘭谿郭仲南

刑部員外

直諫救時屯其如主德昏一身遭剖死千古弔忠魂
殷命天從革孤墳世獨存令名同日月耿耿照乾坤

彭澤陶欽夔

嘉靖庚子

商人杳何處古廟仰春陰天地歸周鼎雷霆識聖心
忠魂存俎豆絕代儼衣衾淇衛流遺恨潺潺咽不吟

永豐陳慶

衛輝知府嘉靖
辛酉

二月柳含烟殷祠肅奠筵孤忠瞻此日靈竅憶當年
群雀簷頭啄繁花野外妍英容誰共伴松栢拱連天

汲郡王信

通判

烈焰正騰空周師尚未東三仁謀自靖一死見精忠
碑勒前朝篆人欽往日風荒岡孤塚在名與華嵩同

句容湯鶴監察御史

諫在名猶在身亡國亦亡一時為宗社千古重綱常

壟樹含生氣泉臺發夜光我來拜祠下吞恨立斜陽

一溪簡霄巡按河南監察御史

臣忠當死諫君義却胡為白刃風霜烈丹心天地知
綱常原有在國事竟成非香火千年祀神人得所依

永新劉定之翰林學士

赫赫殷王子由來直諫臣獨夫觀七竅尼父嘆三仁

墓古無藏骨祠荒有塑神悠悠百世下幾箇逆龍鱗

寧州呂顒嘉靖戊申

殷仁書慕父卓範幸瞻今派屬情初切梅資望獨深
近郊仍漸麥入闕擅芳林肅奠青山外休懷薇蕨心

樵李王錫命河南僉事

殷道日沉酒朝歌聞采薇何知骨鯁陳復與龍鱗違
貫日心偏壯回天力已微殘碑帶孤塚讀罷一沾衣

殷太師忠烈錄卷六終

殷大師忠烈錄卷七

華亭曹安以寧編集

上黨暴孟奇純甫重編

廣陵李應陽稚玄校訂

廬陵李昌祺河南布政

七言律

孤墳遠在太行阿直諫剗心事不磨今日我來頻太
息當年公死竟如何荒祠隱隱村翁守古木蕭蕭野
鳥歌惟有累朝碑碣在行人經過幾摩挲

上海張趨衛序教授

忠言當日忤猖狂剖腹真因社稷亡白骨有封承聖

武黃泉無愧見成湯常時慘霧迷淇水薄暮愁雲結
太行讀罷斷碑長太息西風蕭瑟送斜陽

四明張楷 僉都御史

自靖無言信有由殺身無怨亦無尤仁于尼父書中
見魂逐龍逢地下遊草滿平岡藏狡兔藤垂古木蔭
荒丘當年生氣今猶在一弔忠魂一淚流

都昌鄭岳 伴讀

披忠露赤犯顏時視死如歸了不疑極言總因宗國
計刳心寧憾主恩虧荒烟宿草迷孤隴落日行人讀
斷碑一束生芻奠祠下螻蛄榆柳不勝悲

蓋屋王璽 武陟尹

因過朝歌拜比干獨憐廟墓莽蒼間生前不欲君心
逸沒後猶懷國步艱耿耿精忠垂宇宙堂堂遺像肅
塵寰許身不愧南金重萬古高名並泰山

漳川盧信 進士

天下三分二已周箕奴微去子何求生如伊尹扶商
日死似龍逢諫夏秋孤節獨隨天地老三仁並著古
今優道旁高塚麒麟臥夜夜忠光貫斗牛

莆田林文 翰林學士

少師殷曹國元臣國祚將亡豈顧身痛切寸心輕一

死名稱千古重三仁逃居石室存遺孕賜姓長林寵
後人周武下車封厥墓大明忠孝爲君親

阜城李貴 藩司經歷

朝歌城北草芊芊荒塚巋然不計年松梓色深含宿
雨祠堂人靜鎖寒烟一身諫死寧珠碎千古如生愧
瓦全極目商郊無限恨夕陽衰柳噪秋蟬

慈溪林垚 脩武教諭

日落西林慘夜臺少師沒後起人哀但知義重如山
嶽不覺身輕似草萊牧野有碑荒蘚合鉅橋無粟野
花開經過此日羞蘋藻獨立蒼茫首重回

江陰吳啓 霍州學正

金德微時曆數屯少師於義合捐身剝心未足爲公
病殺諫徒勞損帝仁春雨鹿臺惟長草秋風汲水自
生蘋周封古墓今猶在常使行人淚滿巾

四明金湜 太僕寺丞

箕囚微去足潜然猶是殷家未盡年逆耳有言期悟
主剖心無計可回天汲中古墓千秋祀淇上荒臺數
仞煙此日經過想餘烈不禁清淚激寒泉

昆陵趙佑 新鄉教諭

自獻先王已舍生寸衷日月可同明連朝直諫深憂

主一旦輕身豈爲名青草淒淒高塚沒白楊獵獵斷
碑橫祠前衛水聲嗚咽常使行人抱不平

香巖僧覺澄

雲中人

疋馬東風古道傍忠臣此地有祠堂犯顏不忍辭君
去剖腹那知爲國亡銅柱沉沙芳草合土橋流水落
花香殷勤拜罷傷心曲細讀碑銘對夕陽

濡湏薛遠

工部侍郎

自分忠誠可格非豈知商道已寢微謾拚一死盡臣
職那惜餘生避禍機卹典褒崇天地久高風赫烈古
今稀穹碑荒塚秋原裏千載令人仰德輝

錢唐姚廷彥

鄘城西北太師墳義膽忠肝世共論高塚有狐眠白
晝古碑無字立黃昏孽龍逝後乖風息直道由來汗
簡存此日登祠一瞻拜寒烟衰草欲銷魂

永嘉孫昭

監察御史

殷墟猶枕衛河涯立馬殘陽有所思鷺影空塚雜禾
黍雲穹古堞見旌旗看碑墮淚比干墓履地驚心牧
野師誰說頑民梗周化陰謀韜略至今疑

慈谿顏鯨

監察御史
嘉靖四十四年

比干遺墓尚殷邦落落豐碑草樹荒苦口非因沽直

道素心惟恐負先王三仁大烈蒼天合百代精忠白
日光道左衣冠聊肅拜清風凜冽過高楊

錢唐蔣瑛
懷慶教授

大厦將顛不可扶少師力爭死非辜三仁旣得稱尼
父七竅何妨視獨夫忠義昭昭青史載英風凜凜後
人模高墳寂寞鄜城北一度登臨一嘆吁

南陽張用翰
吏部侍郎

紂惡如山苦莫禁忠臣進諫世難尋只憂此際將傾
國不顧吾生竟剖心祠宇巍巍高倚漢松楸鬱鬱久
成林幾回經過遙瞻望再誦三仁發短吟

眉山余子俊
西安守

死諫都言分所宜誰人肯向死前爲奈何國步艱難
日便是師臣受戮時半夜寒鴉喧古木千年蒼蘚蝕
殘碑品題未足爲輕重自有孤忠天地知

新建萬泰
懷慶推官

王子商家號大賢稜稜英氣上摩天直言奮向君王
諫素志深期社稷全一片心從當日剖萬鈞名在後
來傳藤蘿古墓臨官道幾讀穹碑涕淚漣

四明宋琰
兵部侍郎

獨將蘋藻薦荒祠想對商辛直諫時死節祗緣親義

重忠心寧忍國家危狐踪兔跡千年塚螭首龜趺歷
代碑日暮西風送隣笛據鞍聽處益淒其

泰和甌陽翹

王子祠堂何處尋衛城西北地幽深惟思與國同休
戚豈料傷身竟陸沉春雨斷碑粘碧蘚夕陽枯木噪
飢禽一從尼父稱仁後千古令人恨不禁

豐城李崧 黃州訓導

自負忠誠百鍊鋼剗心死最堪傷堂堂廟貌高岡
下轟轟墳塋古道傍雨打落花偏寂寞風搖孤木更
淒涼當年辛受能聽諫歷數寧教絕有商

岐山張翀

臺苑增崇社稷孤當時誰復與匡扶奸人進矣賢人
退微子去之箕子奴無奈君王甘有過可憐百姓獨
何辜少師直諫心遭剖留得高墻在故都

信陽袁洪 監生

烈祖垂基六百年那知末葉棄仁賢為奴尚冀君心
悟抱器惟求宗祀全七竅不辭剗利刃孤忠端可格
皇天褒封豈獨膺崇秩香火綿綿有墓田

蘭州文志楨 行人

箕子為奴微子去少師獨諫死何辭心剗七竅天人

憤名並三仁宇宙垂高塚
峩峩臨大道太行隱隱對
殘祠嗟予奉使常經過
駐馬斜陽讀斷碑

姑蘇夏思義

師相祠堂獨凜然峩峩荒塚幾經年
居人仰止踈林杪過客吁嗟大道前
只欲推誠綬赤子豈知遭剖入黃泉
或囚或去惟公死留得三仁萬古傳

蘭州段堅

南陽知府

宣尼古篆蘚苔封王子孤墳草莽中
仁遇不仁仁自得死猶未死死誰同
剗腸血漬九迴碧落刃心開一縷紅
時有野禽來樹上哀哀應似泣精忠

雞澤劉誠

翰林檢討

殷衰人厭牝雞晨自靖無言意已深
一死都緣宗國計九原猶抱格君心
堂堂大義光天地凜凜英風邁古今
想得精靈應未散愁雲長鎖太行岑

古衛李貴

儒士

商辛無道肆行誅骨肉情親可面諛
不惜直言三日諫那知罹暴一心剗
塚間野鳥頻嗚咽陌上行人每嘆吁
歷代崇祠絲血食忠名天壤與之俱

清江彭綱

汝州守前兵部員外郎

湯廟看來漸向危臣今合以死支持
夷齊能諫應難

致箕啓堪同別有爲相土海邊風瑟瑟在人山下雨
絲絲先生若在戈當豎好問前徒是阿誰

河東金舜臣 衛輝知府

英英王子位元臣忍看商家國步屯極力諫時期悟
主甘心剖處竟忘身墓從周武封來舊祠到 皇明
飾更新作郡我叨躬祀事每逢瞻拜倍傷神

安成劉肇 衛輝推官

直諫商廷肯致身爲君應不負平生一朝氣節乾坤
塞千載忠誠日月明祠享春秋當代仰名垂竹帛後
人評衛城使客頻來往古墓停驂倍慘情

銅梁胡仕本 衛庠教授

七竅纔剝血未乾赤旗蚤已動嶠函憂時力諫心徒
切爲國身殲分所甘一死特關宗社重千年還起佞
諛慙荒丘古廟朝歌境慨念孤忠幾駐驂

安成王齊 河南僉事

自從闕下逆龍鱗埋骨荒岡幾度春只爲國危甘一
死豈圖身後頌三仁千年直諫名猶在當日剝心迹
已陳我爲忠魂懷往事潛潛清淚欲沾巾

雲間李清 河南參議

不忍秋風賦黍離直言寧憚一身危三綱已廢生何

益七廟如存死亦宜荒草殘碑山畔路夕陽枯木墓
前祠獨夫地下相逢處應有何顏見少師

關西閻本 戶部右侍郎

一木難支大厦傾少師此際甚分明祇知直諫迴狂
虐豈計終身赴鼎鑄雲鎖太行疑浩氣水流淇澳似
悲聲周興商滅千年恨封墓稱仁豈是情

又

十萬臣工十萬心誰云王子不憐身舍身多管緣宗
社直諫還應是至親但幸獨夫珍九鼎豈期尼父許
三仁精英從帝歸天上廟貌空餘衛水濱

管州周正

南行暮過古賢墳鴉陣驚飛日色昏七竅不通商祀
盡孤忠應見史書存西風老樹悲寒雨杜宇空山泣
夜魂墓道有碑宣父筆高名萬古照乾坤

郡人張繼 參政

一謁忠祠心欲摧英雄萬古重吾思虞廷有道資謨
弼辛室無人拜父師天地深愁猿鶴恨古今正氣岳
山移忘身為國輕如羽孰使逋夫能自知

郡人張衍瑞 太常少卿

王子祠堂衛水濱夕陽荒草臥麒麟一時直節超千

古當代同心更幾人拒諫忘危遭虐主剗心甘死爲
宗親我來拜仰餘光下細讀殘碑倍慘神

永年申綸衛輝知府

十尺封堂拱太行千年忠烈耿餘光極言自信師臣
重祗死誰拚社稷亡剖腹豈其識聖者矢心只欲獻
先王爲邦合辦春秋祭對越令人倍感傷

郡人劉傑用陳通判韻

微箕去國并佯狂諫輔身亡國亦亡生直犯顏匡紂
主死甘自靖獻成湯剖聞七竅知忠赤品列三仁播
耿光千載朝歌荒塚在行人經過重悲傷

廣陵李從龍

微去箕囚國欲亡獨將靖獻報先王生鸚鵡久著興周
兆鳴牝猶酣滅毫祥死似龍逢忠更烈諫如梅伯慮
尤長一從尼父稱仁後萬古名懸日月光

臨清周易河南府推官
隆慶五年

至親憂國進危言豈料獨夫竟寡恩刑戮寧甘同草
芥綱常自許配乾坤山陵仍抱孤忠恨簡策猶傳百
代冤多少英雄空洒淚停驂聊爲一招魂

清江劉素

曾於書史見三仁今日淒涼過古墳玄鳥生商初受

命牝鷄司曉竟述君斷碑春老埋芳草遺廟年深闕
暮雲莫道逆鱗應取禍親親名分可離羣

關西雷霖 前翰林檢討

匹馬斜陽入衛郊忠臣祠下草如毛捐軀志幹乾坤
轉垂世名同日月高暮雨野花生意在秋風古木怒
聲號三仁獨起宣尼嘆歷代褒封祀典饒

又

平蕪古廟祀殷臣駐馬西風仰嘆頻孟子七篇推取
義魯論一部重成仁泉聲夜逐鍾聲落山色晴連草
色新想是忠魂長不散無心樹發萬年春

郡人徐朝元 知府

太師高塚衛郊西劒氣光騰星斗齊古木陰森幽鳥
弄青山環抱老猿啼當年祇爲存宗祀後世爭將作
品題今日我來祠下拜新醪一榼手親携

羅山劉淮 副使

古廟荒墳路轉西春歸衛野燒痕齊地中白骨雲還
黯天外青山鳥自啼墓石尚傳尼父字封碑重塌武
王題招魂更有風前涕欲薦蘋花手自携

郡人阮吉 參政

曆數承湯六百春嗣君沉酒慨商辛覆車有鑒追亡

禁拒諫無辜殺至仁牧野誓師方自武鉅橋積粟已
非殷朝歌獨有忠祠在祀典綿綿歲獻蘋

武昌吳國倫 河南參政

斷碣誰題古太師道傍孤塚自累累三宗無力回商
鼎一諫那能破酒池白霧蒼茫懸首地青天想像剖
心時桃林牧野俱陳迹行路偏含異代悲

上黨暴孟奇

朝歌西北古荒丘謁祭可禁淚滿眸強諫原來求主
悟舍生豈故爲名謀三仁書處乾坤重七竅窺時草
木愁莫怪當年君德闇須知天命已歸周

五言絕句

徐文博 嘉靖元年

商鼎危欲顛忘身植宗祀丹青孤廟在天地元不死
七言絕句

王十朋 宋狀元龍圖閣學士

諫君不聽合忘身豈忍求生却害仁不向天庭剖心
死安知心異世間人

安城彭時 太常少卿兼翰林學士閣老

自信輸忠正幅員豈知心剖得名全鹿臺千尺今何
在不及孤墳萬古傳

又

萬古乾坤八尺墳當年一死冀存殷空勞異代封褒
異竊恐忠魂不願聞

贊皇安民 備序教授

少師期不負君王直諫當年事可傷千古衛源東逝
水潺湲猶自泣忠良

維揚陳奎 進士

不去他邦不作奴甘心一死是良圖簡城西北千
塚風雨蕭蕭木半枯

曲阜鮑繼文 進士

殷祚將移諫輔亡令人過處重悲傷孤墳老樹千年
在正氣長增日月光

富平楊爵 監察御史

人心天意轉岐函夫子安能不殺身一死祇將殷祀
絕空教千古弔三仁

慶都鄭瑛 獲序訓導

直言得得諫君王心剖邦家即踵亡設使當時能改
悟存殷猶可繫苞桑

古巴陶守道

御筆高題死國臣誰知忠愛出天真追思百姓何辜

也千古令人恨莫伸

華容王儼 衛輝知府

寧逐龍逢就粉齏忍看宗國向傾危千秋留得高墳
在行路人歆大字碑

又

拚死猶難悟主衷乾坤日月照孤忠一坯已作殷家
鬼肯受周王代後封

濟南張謙 衛輝同知

直諫頻繁與世違滿懷忠義有天知若非白刃剜心
死那得芳名萬古垂

太原陳璧

少師直諫緣家國初豈容心許殺身亡耐獨夫千載
下祇遺仁字愧奸臣

錢唐蕭源 倉大使

左右林泉鎖暮雲居人稱是比干墳停車佇立懷忠
諫老木鴉聲不忍聞

汲郡毛麟之 御史

孤忠載拜淚痕多起讀殘碑轉嘯歌商篋已移周鼎
失至今高塚鬱嵯峨

滇南張西銘

逝邈從殷故國來東風帝鳥野花開商王陵寢知何處王子孤墳滿碧苔

郡人周鎬副使

其一

野色涵秋漾碧虛忠臣祠繞檜松踈英魂千載今猶在耿耿丹心貫斗墟

其二

蹇蹇宗臣忠慮紆剖心直諫豈爲迂玉階倘有回天力寶曆重懸願足愉

其三

遘禍逆鱗豈昧圖欲將商祚竭忠扶精誠已化星河爛夜夜寒光照碧蕪

其四

杳靄荒丘草逕斜寒山猶自帶雲遮臣模千載同瞻仰鵲鳥啼殘春晝花

殷太師忠烈錄卷七終

那大府忠所錄

卷七

五

